

Prome personahe di luna riba calendario di New India Assurance: Nydia Ecury

Nydia a maniobra su don di palabra manera un spada bon skerpi

ORANJESTAD - Palabra ta cay chiki pa describi Aruba su Genio di Palabra kende durante di su bida largo (85) semper a sa di cautiva, sacudi y conmove comunidad di henter Reino Hulandes cu su habilidad inigualabel, multifacetico y multilingual di ta traduci tur tipo di emocion y situacion di bida den un experiencia personal pa e lector di su obranan y pa su publico presente durante di declamacionnan y presentacionnan cultural y humoristico.

Nydia Ecury

Autor, Poeta, Comediante

**Mi Ta Cultura di mi Pueblo
Corona pa Mannan Real**

**I Am the Culture of my People
Crowned by Royal Hands**



Durante di e revelacion di loke ya ta New India Assurance su di 14 Calendario di Personahe na november 2011 den Cas di Cultura, a presenta varios parti di Nydia su One Woman Show: "Luna di Papel" data for di 1980. Cu esaki Nydia su presencia y energia dinamico explosivo a yena seno di Cas di Cultura di tal forma, cu lo bo a hura cu na e momento ey e mes tabata presente personalmente riba escenario. Esaki a bira de lo mas evidente na momento cu for di e pantaya Nydia a formula e pregunta: "Boso kier mi conta e cuenta di con pushi a mata Chomeme?" y pu-

blico di biaha a reacciona cu "Siii". Atraves di e grabacion Nydia a bolbe puntra: "Serio? Contabo, aunke cu mi no sa sigur si ta berdad of no?" Y cu mas fervor ainda henter publico den sala a bolbe grita "Siiii!!" mientras e grabacion a sigui cu e cuenta conta pa e dama di Nort den ken Nydia a transforma pa cana yega te Playa cu su nieto pa por pasa cerca Shon Annie den Schelpstraat pa pidi'e pa e traha un bolo "rosada" di bruid pa su subrina Stefanita. Durante e proceso den cual e dama ta conta henter su bida, cada rato e ta pasa e nieto (imagi-

nario) banda di dje para un wanta pa e "stop di coba nanishi den Playa" y aparentemente e echo cu e nieto ta sigui pone su cara na berguensa ta pone cu e señora ta dicidi di bay Nort bek numa, dunando luga pa e siguiente personahe di Nydia cual ta varia entre un shon Surnam cu ta core cu mucha di bario for di e mata di kenepa den su cura, un señora di Corsou cu ta haci redo sin misericordia durante un entierro, un macamba cu no sa integra ni maske cuanto aña e tin riba nos isla biba y un variacion asina amplio di caracternan asina tremendamente tipificante cu bo ta hari te lora abou ni maske cuanto biaha bo bolbe mira nan di nobo. De lo mas remarcabel ta, cu ni un di nan nunca hamas no ta papia ni un palabra malo.

Di unda sra. Ecury tabata saca infinito di detaye pa semper sigui borda tur su cuentanan na tantisimo peculiaridad magicamente entretenido ta un misterio. Aparte di ta un hende de lo mas observador y cu nada nunca tabata scapa ni su bista ni su oido, su fantasia obviamente a fungi semper como un aparato exhuberantemente abundante y nunca bo no por deriva ni saca afo si loke e ta conta ta algo cu e mes a mira y experiencia den bida of si ta for di riba pantaya di su

mente el a extrae hilo hilo di cuenta di ocurencianan cu tabata balansa riba un rand fini entre supuesto banalidad trivial y absurdidad cu hilaridad total.

Palabra ta cay chikito pa por extende mas aya di e vocabulario rico na cual Nydia tabatin acceso natural pa eleva cualkier hende of situacion te na cielo, of pa torno loke e lo mester a sinti pa torno por completo na momento cu den su opinion e djis haya holo di inhusticia. Nydia a maniobra su don di palabra manera un spada bon skerpi pa proteha loke p'e ta importante mientras e mes un spada ey al instante por transforma den e textura di e caricia di mas fini y suave manera blachinan di un leli blanco den proceso di gradicimento pa prome rayonan di luz di un dia nobo.

E diseño di e portada di e Calendario di Personahe ta pinta Hooiberg como un volcan cu ta emiti baranca fuerte representa pa cada personahe. Segun palabranan di Caresse Isings, diseñador di e portada: "Esaki ta inspira riba e echo cu Sra. Ecury no ta activo mas debi na e grado avansa di Alzheimer cu a incapasit'e di por sigui crea y comparti manera el a haci henter su bida. Sinembargo mi a bin realisa cu un bela bo ta supla paga cu djis un "ffff"

di supla, mientras Nydia ta manera un volcan pasiona cu bo no por djis paga asina'sina. Parti di dje ya a tuma despedida di mundo, mientras Papa Dios ta tuma su tempo pa e gran fenomeno di naturalesa Arubiano cu yama Nydia Ecury por sigui transcende drenta Divinidad na su debido tempo"

Pues e energia cu New India Assurance ta obsekia Pueblo di Aruba pa apertura di 2012 ta uno di conscientisacion pa cu e forsa di palabra. Na principio tabatin E Palabra y E Palabra tabata cu Dios y E Palabra tabata Dios ~Juan 1:1. Formacion di palabra ta nace den cuna di intencion humano y palabra forma y expresa ta motiva accion y materialisacion di e realidad cu hende ta crea pa nan mes y colectivamente. Den realisacion di esaki tur hende na Aruba por scoge pa durante henter 2012 fiha atencion riba e intencion cu expresion di palabra cu ta sirbi pa progreso colectivo di nos Pueblo, progreso di nos dushi Pais Aruba cu ta manera un mata carga na fruta hecho di hende coloridamente bendiciona cu e potencial fenomenal pa nos por crece, stima y disfruta di ken nos ta, si djis nos scoge di ta consciente, di realisa, aprecia y continuamente conta tur hende cu lo kier scucha, ta kende realmente nos ta. □

Segun sra. Yvonne Spellen "Hende muhe ta keda vulnerabel"

ORANJESTAD - Presidente di Fundacion pa Hende Muhe den Dificultad, sra. Yvonne Spellen a declara na BON DIA Aruba cu durante e aña 2012 e fundacion lo keda cu e mesun meta.

El a afirma cu e meta di e fundacion cu e ta presidi ta di duna ayudo na e hende muhe cu ta wordo maltrata. E ta lamenta cu e fenomeno aki tur aña ta keda mescos. Presidente di Fundacion pa hende Muhe den Dificultad a declara cu "hende muhe ta keda vulnerabel".

Di otro banda sra. Spellen a indica cu nan ta tratando pa traha mas profesional posibel, y e fundacion ta papiando cu Gobierno pa nan wak si Gobierno tambe ta bay riba e mesun nivel di compromiso pa yega na un miho solucion na henter e problematica di maltrato di hende muhe na Aruba. □